


Universidade de Vigo

Regulamento de prácticas académicas externas

Escola de Enxeñaría Aeronáutica e do Espazo

Aprobado en Xunta de Escola na sesión do 17 de decembro de 2019



Escola de Enxeñaría Aeronáutica e do Espazo
Pavillón Manuel Martínez-Risco
Campus universitario
32004 Ourense

<http://aero.uvigo.es>
<mailto:aero.info@uvigo.es>



Referencia: 2
Documento: practicas
Data: 17/12/2019
Páxinas: 4

Artigo 1. Obxecto, réxime xurídico e ámbito de aplicación

1. O obxecto do presente regulamento é o ordenamento das prácticas académicas externas do alumnado da Escola de Enxeñaría Aeronáutica e do Espazo da Universidade de Vigo (EEAE) que estea matriculado en calquera das súas titulacións.
2. O marco legal que regula as prácticas está definido polo disposto no Real Decreto 1707/2011 do 18 de novembro, polo que se regulan as prácticas académicas externas e dos estudantes universitarios, no disposto no R.D. 1393/2007, do 29 de outubro, polo que se establece o ordenamento das ensinanzas universitarias oficiais, polo Regulamento de Prácticas Académicas Externas do Alumnado da Universidade de Vigo, aprobado polo Consello de Goberno o 24 de maio de 2012, así coma polo presente regulamento e as disposicións do plan de estudos de cada titulación.
3. As prácticas externas poderán adoptar dúas modalidades:
 - a) Prácticas externas curriculares, que se configuran como actividades académicas integradas como materias dun plan de estudos do centro.
 - b) Prácticas externas extracurriculares, que se realizan con carácter voluntario durante o período de formación e que, aínda tendo os mesmos fins que as prácticas curriculares, non forman parte do correspondente plan de estudos. Estas prácticas son reguladas pola Universidade de Vigo segundo o artigo 5.5 do Regulamento de Prácticas Académicas Externas do Alumnado da Universidade de Vigo.

Artigo 2. Definición e características das prácticas externas

1. As prácticas externas constitúen unha actividade de natureza formativa co obxectivo principal de completar e aplicar, nun ámbito profesional, competencias e coñecementos propios do ámbito da Enxeñaría Aeroespacial.
2. As prácticas externas poden realizarse nas entidades, empresas e institucións establecidas polo Regulamento de Prácticas Académicas Externas do Alumnado da Universidade de Vigo.
3. As prácticas externas curriculares disporán da súa guía docente, aprobada pola Xunta de Escola, nas mesmas condicións que calquera outra materia dunha titulación. O responsable de realizar a guía docente da materia de prácticas externas a nivel de grao será o/a coordinador/a de prácticas da EEAE.

Artigo 3. Persoas destinatarias das prácticas externas curriculares e requisitos para realizalas

1. Pode realizar as prácticas externas o alumnado das titulacións da EEAE nas condicións que se establezan, así coma os/as estudantes doutras universidades españolas ou estranxeiras que estean realizando estadias na EEAE en programas de mobilidade.
2. Para realizar as prácticas externas débese estar matriculado na materia de prácticas en empresas da titulación correspondente da EEAE.
3. O alumnado de grao debe ter superado un mínimo de 150 ECTS para poder solicitar a realización de prácticas.
4. O alumnado de mestrado debe ter superado un mínimo de 30 ECTS¹ para poder solicitar a realización de prácticas.

¹A comisión académica de cada mestrado poderá modificar esta cifra se así o estima conveniente.

Artigo 4. Publicación das prácticas externas

1. A EEAE fará pública unha relación de prácticas ofertadas en empresas e institucións. Cada práctica especificará, de ser o caso, a titulación do centro na que deberá estar matriculado o alumnado para a súa realización.
2. A publicación das ofertas de prácticas adecuarase ao establecido no artigo 17 do RD 1707/2011.
3. Unha vez publicada a oferta de prácticas, abrirase un prazo de presentación de solicitudes para o alumnado das diferentes titulacións.

Artigo 5. Adxudicación das prácticas externas curriculares

1. A persoa coordinadora da materia das prácticas en empresa fará a selección do alumnado solicitante para a realización de prácticas externas, tendo en conta a nota media do expediente académico e o número de prazas ofertadas.
2. O alumnado admitido para a realización das prácticas escollerá destino entre as prácticas ofertadas por estrita orde de adxudicación.
3. Se un alumno/a chega a un acordo cunha empresa para a realización dunha práctica que cumpra as condicións para considerarse práctica curricular, poderá solicitar á persoa coordinadora da materia das prácticas en empresa a adxudicación directa desa praza, sempre que o faga nos períodos administrativamente requiridos.

Artigo 6. Tutela do alumnado nas prácticas externas

1. Cada alumno/a de prácticas terá un titor/a académico/a e un titor/a na entidade externa. No caso de prácticas curriculares, o titor/a académico será a persoa coordinadora da materia das prácticas en empresa ou persoa en quen delegue. No caso de prácticas extracurriculares, o titor/a académico será un profesor/a con docencia na EEAE.
2. A Xunta de Escola establecerá, no marco que determine a normativa da Universidade de Vigo, o recoñecemento do profesorado que realice tarefas de titorización de prácticas externas, se se considerase pertinente.

Artigo 7. Cualificación das prácticas externas

1. Tras finalizar o período de prácticas, no prazo establecido na convocatoria, a/o estudante e o/a titor/a externo deben entregar ao titor/a académico da universidade un informe sobre o traballo desenvolvido. No caso de prácticas curriculares, ese informe consistirá nunha memoria que conteña os puntos indicados na normativa da Universidade a tal efecto.
2. O método de avaliación das prácticas curriculares será o recollido na guía docente da materia e deberá ter en conta os informes mencionados no parágrafo anterior. A avaliación será realizada polo titor/a académico ou, na súa ausencia, polo/a coordinador/a de prácticas do centro.

Artigo 8. Prácticas en empresas e traballo de fin de grao

1. Non será obxecto de recoñecemento pola materia de Prácticas en Empresa a estadia realizada nas instalacións dunha empresa con motivo do desenvolvemento do Traballo de Fin de Grao.

Artigo 9. Recoñecemento das prácticas externas extracurriculares no Grao en Enxeñaría Aeroespacial

1. A realización de prácticas académicas externas extracurriculares poderá conlevar o recoñecemento da materia correspondente ás prácticas curriculares da titulación se así o solicita o alumno/a, sempre e cando o número de horas corresponda ao número de créditos da materia (mínimo de 25 horas por crédito ECTS) e se acredite a adquisición das competencias asociadas á materia.
2. Para o seu recoñecemento, será preciso que as prácticas realizadas cumpran os requisitos especificados para as prácticas curriculares. En particular:
 - a) O/a alumno/a debería ter superados 150 créditos ECTS antes da finalización das prácticas. Se no momento de finalizar as prácticas non se cumpre o requisito dos 150 créditos ECTS aprobados, as prácticas non serán recoñecidas aínda que a dita cifra se acade con posterioridade.
 - b) Debe existir un titor/a académico e un titor/a na empresa.
 - c) Debe respectarse o que estea estipulado na guía docente da materia Prácticas en Empresa.
 - d) A/o estudante e o/a titor/a externo deben entregar ao titor/a académico da universidade unha memoria sobre o traballo desenvolvido que conteña os puntos indicados na normativa da Universidade a tal efecto.
 - e) O traballo desenvolvido debe servir para completar e aplicar, nun ámbito profesional, competencias e coñecementos propios do ámbito da Enxeñaría Aeroespacial.
3. A documentación, incluíndo os impresos referentes á realización das prácticas e mais a memoria, deben ser entregadas na secretaría de dirección da EEAE.
4. Recibida a documentación, corresponde á Comisión Académica e de Recoñecemento de Créditos (CARC) analizar que se cumpran os requisitos e, no seu caso, dar o visto bo para o recoñecemento, que será notificado ao alumno/a.

Artigo 10. Recoñecemento das prácticas externas extracurriculares nos mestrados

1. A realización de prácticas académicas externas extracurriculares poderá conlevar o recoñecemento da materia correspondente ás prácticas curriculares da titulación se así o solicita o alumno/a, sempre e cando o número de horas corresponda ao número de créditos da materia (mínimo de 25 horas por crédito ECTS) e se acredite a adquisición das competencias asociadas á materia.
2. Corresponde á Comisión Académica de cada mestrado establecer as normas específicas, requisitos e procedementos para o recoñecemento.
3. Corresponde á Comisión Académica de cada mestrado a aprobación dos recoñecementos.